



# PUJOORFINNIK PAAVIAASARNERMI AKINUT MALE-RUAQQUSAQ

**Qeqqata Kommuniani pujoorfinnik paaviaasarnermi atuisut akiliuteqartarnissaanni najoqqutassiaq.**

## **1. Inatsisitigut tunngavissaq.**

Kalaallit Nunaanni pujoorfinnik paaviaasarneq il.il. pillugu Ministeriaqarfimmit Nalunaarut 28. november 1980-imeersoq naapertorlugu pujoorfinnik paaviaasitsisarnissamik kommunip pisussaaffeqarnermini aningaaasartuutanut akiliutissaq.

## **2. Kikkunnut akiligassiisoqartassanersoq.**

Kommunimi nunaminertamik atugassiisarfimmit paassisutissat naapertorlugit pujoorfinnik paaviaanermi akiligassaq illumik piginnituusumut nassiunneqassaaq. Pujoorfinnik paaviaanermut akiligassaq malittarisassat naapertorlugit Ini A/S-imut ingerlanneqartuni illumut akiligassiissummut ilaasarmat, pujoorfimmik paaviaanermut akiligassaq Ini A/S-imut ingerlanneqassaaq, tassa Ini A/S illumik nakkutilisuuppat. Taamaattumik piginnittoq namminerisaminik attartortitsisimaguni attartortunilu iluminni isumaqatigiissutigissavaat, pujoorfiup paaviarneqarnerani akiliisoqassanersoq imlt. illumik/inimik attartornermi akiligassamut iluarsiissutaassanersoq.

## **3. Qaqugukkut akiligassangortitsisoqartartoq.**

Paaviaasoqartillugu tamatigut kingorna akiligassiisoqartassaaq. Akiligassap allagartaani paassisutissat naapertorlugit akileereerfissap killissaa ullulerneqassaaq. Ukiut marloriarluni paaviaasoqartarnissaanik nalunaarummi piumasaqaataasup saniatigut paaviaasitsisoqarniarpat, piginnittup nammineq akilissavaa.

## **4. Akigititat.**

Ukiut missingersuutit akuersissutiginerinut atatillugu Kommunalbestyrelsip akigititassat aalajangersagai atorneqartarpuit, Kommunillu akigititaani erserput. Ukiup ilaannaa pujoorfik atorneqarsimagaluarpuallunniit akigititanik appaalluni akiligassiisoqarneq ajorpoq.

Pujoorfimmut ataatsimut atuinermut/ingerlatsinermut akiliutaavoq. Pujoorfik atorunnaerneqartoq Kommunimut nalunaarutigineqassaaq, pujoorfinnillu paaviaasitsisarnermit peerneqannginnerani pujoorfik asserneqqaassalluni.

Paanik nakkaanikunik sanerneq piaanerlu pujoorfinnik paaviaanermi akigititamut ilaareerput. Pujoorfik kissarsuutip igartaanut ikkunneqarsimappat, paaviaanermi paaq tassunga nakkaanikoq peerneqassaaq. Kissarsuutip igartaata salinnersa imlt. kissarsuutip uuliatortup / innisaataata iluarsineqarnera akigitinneqartumut ilaangilaq, tamanna illumik piginnittup/attartortup akilertussaavaa.

Paaviaasup pujoralammik milluaasumut qammaqqutissaminullu quillilersorneranut illumit innaallagissamik atuinera naatsorsorneqarneq ajorpoq.

Kissarsuuteqarfiup pallikkuminartuunissaaj najugaqartup pisussaaffigaa, taamaalilluni paaviaasoq paakuiaavimmut kissarsuummullu uuliatortumut palliguteriaannaanerussaaq.

## **5. Illunik inoqanngitsunik akiliinngiffeqarnissaq.**

Sulinngiffeqarluni, piniariarluni assigisaaluunniit pillugu angalanermi piffissami sivikitsumi ukumik ataatsimik sivisunerunngitsumi peqannginnissaq peqqutigalugu pujoorfiit paavia-neqarneranik akiliuteqanngikkallarnissaq periarfissaanngilaq.

Allamut nuunnermi assigisaaluunniit pissutigalugu illu ukioq ataaseq sinnerlugu inoqarsi-manngippat, inoqanngiffissaa ullunik 30-nik sioqqutsisumik kommunimut allakkatigut nalunaaruteqartoqarsimatillugu, piffissaq inoqarsimanngiffia tassa ukioq naallugu pujoorfiup paaviarneqarneranik akiligassiissuteqartoqassanngilaq. Illu ukioq ataaseq atorneqarsimanngitsillugu utertoorutissap allagartaanik pissarserusuttoqartillugu ukiup ilivitsup nutaap aallartinnerani aatsaat tamanna pisinnaavoq, utertoorutissap allagartaanik tunniussisoqartillugu kiffartuussinermi akiliut malitsigisanik peerneqartarpooq.

Siumut ilisimatitsisoqareeraluertoq entreprenøreq illumut isitsaaliorneqarsimatillugu paaviasoqarsimatinnagu utertoortitsisoqartitsineq ajorpoq.

Pujoorfiup atorneqarnerani pujoorfiup paaviarneqarneranut akiligassiinnginneq aatsaat pisinnaavoq, piginnittooq (attartortunngitsoq) inatsisit naapertorlugit pujoorfiit paaviarneqartarnissaanik piumasaqaat isumagissallugu tamakkiisumik akisussaaffiginiarlugu nalunaa-rummik atsiorsimappat kiisalu ukumut paaviaasitsisimanermi uppernarsaammik nassiussi-sassalluni.

## 6. Paaviaanissamut ilimasaarineq

Pujoorfinnik paaviaasoq sivikinnerpaamik ullunik arfineq marlunnik sioqqutsisumik agger-nissaminik siumut ilisimatitseriissaq. Nunaqarfinni takusassianut nivinngaavinni siumut ilisimatitsineq pisassaaq. Illoqarfinni ilisimatitsissutinnguamik allakkat nakkartitsivianut siumut ilisimatitsineq pisassaaq. Siumut ilisimatitsisoqareeraluertoq paaviaasup paaviaaffissaa ammatinnejarsimanngippat, ilisimatitsissuterrannguamik allakkat nakkartitsivianut matumulluunniit nivinngaanikkut ilisimatitsisoqaqqissaq. Aappassaanik siumut ilisimatitsisoqareeraluertoq paaviaasoq paaviaaffissaanut isernissaanik ajornasaartoqaqqissimappat, isitsa-liorneqarsimanertut tamanna isigineqassaaq, asulilu piffisajaasimanermi akunnernik atuk-kanik akiligassiisoqassalluni.

## 7. Naammagittaalliorneq

Pujoorfiup paaviarneqarneranut akiligassinneqarnermi pujoorfiulluunniit paaviarneqanngit-soornera imlt. paaviaasup paavianermini ajoqsiisimanera pillugu naammagittaalliu-tissa-qartilluni, naammagittaalliu Qeqqata Kommunianut, Postboks 1014, 3911 Sisimiut, fax 86 34 23, imlt. e-mail [Qeqqata@qeqqata.gl](mailto:Qeqqata@qeqqata.gl) nassiunneqassaaq.

Akiligassap tiguneraniit imlt. pavianerup isumagineqarneraniit naammagittaallior-nissamut periarfissaq sapaatip akunnernik arfinilinnik sivisussuseqarpoq.

## 8. Atuutsitsilerneq

Maleruaqqusaq Kommunalbestyrelsemi akuersissutigineqareernerata kingorna ullut 30-t qaangiunnerani atuutilissaq.

Qeqqata Kommuniani Kommunalbestyrelsemitt, 2010-mi februar-ip ulluisa 23-ani akuersissutigineqarpoq.



Hermann Berthelsen  
Borgmesteri



Paneeraq Olsen  
Kommunimi pisortaaneq